

01

《苦热诗》

任昉

旭旦烟云卷，烈景入东轩。
倾光望转蕙，斜日照西垣。
既卷蕉梧叶，复倾葵藿根。
重簟无冷气，挟石似怀温。
霖霖类珠缀，喘吓状雷奔。

02

《苦热诗》

何逊

昔闻草木焦，今窥沙石烂。
瞿瞿风逾静，瞳瞳日渐旰。
习静闼衣巾，读书烦几案。
卧思清露浥，坐待高星灿。
蝙蝠户中飞，蟪蛄窗间乱。
实无河朔饮，空有临淄汗。

遗金不自拾，恶木宁无干。
愿以三伏晨，催促九秋换。

03

《咏席诗》

柳恽

照日汀洲际，摇风渌潭侧。
虽无独茧轻，幸有青袍色。
罗袖少轻尘，象床多丽饰。
愿君兰夜饮，佳人时宴息。

04

《苦暑诗》

刘孝威

暮日苦炎溽，迁坐接阶廊。
月丽姮娥影，星含织女光。
栖禽动夜竹，流萤出暗墙。
香盘糴鲜粉，雕壶承玉浆。
白羽徒垂握，绿水自周堂。
弱纨犹觉重，纤絺尚少凉。

弄风思汉朔，戏雨忆吴王。
玄冰术难验，赤道漏犹长。
谁能更吹律，还令黍谷凉。

05

《苦热行》

萧纲

六龙骛不息，三伏起炎阳。
寝兴烦几案，俯仰倦帟床。
滂沱汗似铄，微靡风如汤。
洄池愧玉浪，兰殿非含霜。
细帘时半卷，轻幌乍横张。
云斜花影没，日落荷心香。
愿见洪崖井，讵怜河朔觞。

06

《和乐仪同苦热诗》

庾信

火井沈荧散，炎洲高燄通。
鞭石未成雨，鸣鳶不起风。

思为鸾翼扇，愿借明光宫。
临淄迎子礼，中散就安丰。
美酒含兰气，甘瓜开蜜筒。
寂寥人事屏，还得隐墙东。

07

《舟中苦热遣怀奉呈阳中丞通简台省诸公》

杜甫

陽中丞，即陽濟，時兼御史中丞。《通鑑》：“臧玠之亂，澧州刺史楊子琳討之，取賂而還。初，崔旰殺郭英乂，子琳起兵討旰，杜鴻漸各授官以和解之。及子琳攻旰敗還，縱兵涪夔，衛伯玉請於朝，以爲峽州團練使。”甫詩所謂“徧裨表三上，鹵莽同一貫”者，合前後三叛言之也。“始謀誰其間”，蓋追論鴻漸、伯玉，故曰“回首增憤惋”。唐藩鎮有事，俱用徧裨上表，假衆論以脅制朝廷也。

愧为湖外客，看此戎马乱。
中夜混黎氓，脱身亦奔窜。
平生方寸心，反掌帐下难。
呜呼杀贤良，不叱白刃散。
吾非丈夫特，没齿埋冰炭。
耻以风病辞，胡然泊湘岸。
入舟虽苦热，垢腻可溉灌。
痛彼道边人，形骸改昏旦。
中丞连帅职，封内权得按。

身当问罪先，县实诸侯半。
士卒既辑睦，启行促精悍。
似闻上游兵，稍逼长沙馆。
怜好彼克修，天机自明断。
南图卷云水，北拱戴霄汉。
美名光史臣，长策何壮观。
驱驰数公子，咸愿同伐叛。
声节哀有馀，夫何激衰懦。
偏裨表三上，卤莽同一贯。
始谋谁其间，回首增愤惋。
宗英李端公，守职甚昭焕。
变通迫胁地，谋画焉得算。
王室不肯微，凶徒略无惮。
此流须卒斩，神器资强干。
扣寂豁烦襟，皇天照嗟叹。

08

《夏至避暑北池》

韦应物

昼晷已云极，宵漏自此长。
未及施政教，所忧变炎凉。
公门日多暇，是月农稍忙。

高居念田里，苦热安可当。
亭午息群物，独游爱方塘。
门闭阴寂寂，城高树苍苍。
绿筠尚含粉，圆荷始散芳。
于焉洒烦抱，可以对华觞。

09

《和尉迟侍郎夏杪闻蝉》

戴叔伦

楚人方苦热，柱史独闻蝉。
晴日暮江上，惊风一叶前。
荡摇清管杂，幽咽野风传。
旅舍闻君听，无由更昼眠。